

Discurso Sharmaine Tromp
14 April, 2008
Conferencia di prensa Extraordinario

Cas di Partido Playa

Bon tardi, mi nomber ta Sharmaine Tromp y mi ta studiante di La Salle College, klas 4.

Na Prome lugar danki pa e invita nos pa un rueda di prensa aki na Cas di Partido AVP. Mi kier a bisa si, cu e motivo cu nos ta den accion no tin nada di haber cu politica. Mescos ora cu un baby nace e ta dal un grito pa anuncia cu el a yega mundo, nos tambe ta alza nos voz pa wordo scucha.

Empleadonan publico ta den welga pa indexering, pasobra costo di bida ta halto y placa no ta yega pa biba drechi. Esaki a causa cu nos di ultimo aña di La Salle College a perde hopi les y no ta debidamente prepara pa S.O.

Nos no kier culpa niun hende di esaki, nos conose e problema, loke nos kier ta un solucion. Otro problema grandi ta e estado fisico di hopi scol na Aruba. E scolnan ta den un estado asina deplorabel cu e ta bira un peliger pa bay scol.

E bañonan ta core over di awa sushi, kiermen bo por contagia cu bacteria si bo usa e baño y esunan cu no hasi usao di dje tambe por bira malo pasobra bo ta keda por lo menos 6 ora na skol, sin por usa baño.

Y esaki ta sin papia di e condicion di dak y murayanan cu cualkier momento por bin abao y causa un desgracia. Y aki nos no ta papia di La Salle College so, si no di hopi otro skol na Aruba.

Asina por sigui nombra hopi otro cosnan mas cu tin na skol, p.e. no ta e maestronan y studiantenan y otro personal so ta atende skol, si no tambe hopi insecto, manera cacalaca, sangura, maribomba y bij.

E motivo di e accion aki ta pa bin cu un mehora. Un pais cu ta den progreso ta zorg pa su nivel di educashon y su cuida medico ta na prome lugar. Sin importa si ta skol di gobierno of di fundashon of priva.

Nos ta e futuro di Aruba y e gobierno di Aruba mester zorg pa hasi tur loke ta na su alcance pa nos haya un bon educashon, den un ambiente agradabel.

Nos gobernantenan no mester lubida cu si nos no wordo bon prepara, Aruba no ta bai tin un futuro garantiza.

Loke nan sembra awe, nan ta cosecha mañan.

Un pais cu ta den progreso no kiermen cu ta su gobernantenan so ta gana y biba bon. Paso esey ta e caso tambe na hopi otro paisnan rond mundo cu ta wordo categoriza como "paisnan di tercer mundo."

Discurso Sharmaine Tromp
14 April, 2008
Conferencia di prensa Extraordinario

Cas di Partido Playa

Aruba ta un pais democratico y pesey mes nos tambe ta den accion. Y no lubida cu pa September 2009 hopi di nos ta bay tin edad pa vota. Y nos lo hasi bon uso di dje.

Danki.